

T 9299

3122

107

新編古今事文類聚卷之五

西江賓大月時可編

都省部

中書省

歷代沿革

黃初初改秘書省為中書省武
帝以秘書省中書省中書省

職置主書令史中書省監令各一人

中書省管司玉言及司進御之音樂并司伶

官又領舍人省掌署勅行下宣旨勞問

新編古今事文類聚卷之五

新集

南江富大用時可編

都省部

哈佛大學漢和
圖書館珍藏印

書目

藏書

中書省

歷代沿革

魏黃初初改秘書省為中書省晉武帝以秘書并中書省南齊中書省

職置主書令史梁中書省監令各一人後齊

中書省管司王言及司進御之音樂并司伶官又領舍人省掌署勅行下宣旨勞問隋內

史省監令各一人煬帝大業十二年改內史省爲中書省唐武德三年改內書省曰中書省龍朔元年改曰西臺光宅元年改中書省曰鳳閣開元元年改中書省曰紫微省時謂尚書省爲南省門下中書爲北省亦謂門下爲左省中書爲右省或通謂之兩省宋中書省掌進擬庶務宣奉命令除授省臺寺監長貳館閣帶職提舉官已上臺諫章奏臣僚陳請興革廢置及內外取旨之事又有尚書省門下省謂之三省。大元初有尚書省續以

中書省爲都省有中書令右丞相左丞相平章重事平章政事右丞左丞參知政事簽書省事斷事官左右司郎中員外郎都事管勾承發司照磨經歷知事管勾在外又置行中書省至元二十四年復改爲尚書省

古今事實

有瑞柳樹

呂渭授禮部侍郎中書省有柳樹建中末枯死興元元年車駕還京後其樹再榮人謂之瑞柳樹渭試進士取瑞柳爲題上聞而嘉之

謂鳳凰池

中書省地在樞近多承寵任是以人固其位謂之鳳凰池通典

為東西臺

治平二年祖無擇言門下中書與尚書三省其長官皆宰相之任今乃左省在西右省在東不可乞將中書省與門下省對移唐龍朔中嘗改左右省為東西臺

曰左右曹

漢應邵官儀曰左右曹受尚書事前世文士以

中書在右因謂中書為右曹又稱西掖

古今文集

古詩

贈徐幹詩

劉楨

誰謂相去遠隔此西掖垣拘限清切禁中情無由宣

直中書省詩

謝玄暉

紫殿肅陰陰彤庭赫弘敞風動萬年枝日華承露掌玲瓏結綺深沉映珠網紅藥當堦翻蒼苔依砌上茲言翔鳳池鳴佩多清響信美非吾

室中園思偃仰明情已鬱陶春物方駘蕩安得
凌風翰聊恣山泉賞

中書郎詩

卞伯玉

大方信包含優渥遂不已躍鱗龍鳳池揮翰紫
宸裏

行省

歷代沿革

自魏晉有之謂之行臺魏末晉文
帝時諸葛誕散騎常侍裴秀尚書
僕射陳泰黃門侍郎鍾會以行臺從晉永嘉

四年東海王越帥衆許昌以行臺自隨後魏
亦置行臺孝武永熙二年罷諸行臺尋詔復
以渤海王高歡為大行臺隨機裁處後齊亦
皆隨權制而置員焉隋置行臺省有尚書令
僕射都事侍郎等員蓋隨其所管之道置於
外州謂之行臺尚書省唐武德初以諸道軍
務事繁分置行臺尚書省貞觀以後廢後諸
道只各置採訪等使兼判尚書事蓋行臺之
遺制也宋無行臺省大元外道置行省有左
右丞參政僉行省斷事官同僉省咨議郎中

員外郎都事照磨管勾

羣書要語

匡維將士鎮撫疆場儲積器用愛
活黎民隱若敵國顏氏家訓張道

携為晉州行臺左丞

古今事實

理邊民冤

北齊武定八年辛術為東南道行臺東徐州刺史郭志殺郡守文宣聞之勅術曰江淮初附百姓難向京師留卿為行臺欲理邊民冤枉監理牧守自今以後所統十餘州地諸有犯法刺史

先啓聽報以下先理後表齊代行臺兼總民事自術始也

有王佐才

北史蘇綽為周文帝行臺郎中在官歲餘未見知臺中咸稱其能僕射周慧達稱其有王佐才時文帝與公卿往昆明池觀魚至漢故蒼池顧問左右莫有知者或曰蘇綽博物乃召問綽應對如流文帝嘉之乃令綽並馬至池及夜還留綽問以政道卧而聽之文帝乃起整衣冠危坐不覺膝之前席語遂達曙詰朝謂周惠達曰蘇

綽真奇士也即拜大行臺左丞參典機密自是
寵遇日隆

辦槽解圍

獨孤永業後主時為河陽道行臺僕射落州刺
史周武帝親攻金墉永業出兵禦之曰是何達
官作何行動周人曰至尊自來主人何不出看
客永業曰客行忽速是故不出乃連夜辦馬槽
二千周人聞之以為大將軍至乃解圍去

備艇全橋

北齊張亮為行臺左丞高仲密之叛也與斛律

金守河陽周太祖於上流放火船燒河橋亮乃
備小艇百餘艘皆載長鑊鑊頭施鈎火船將至
即馳小艇以鈎鈎之分鑊向岸船不得及橋之
獲全亮之力也

專制河南

侯景為南道大行臺位司徒言於神武曰恨不
得兵三萬橫行天下要須濟江縛取蕭衍老翁
以作太平寺主神武壯其言使擁兵十萬專制
河南仗任若已之半體

拜鎮東都

屈突通判陝東道行臺左僕射時從討王世充
世充平論功第一拜陝東道大行臺右僕射鎮
東都

中書令

歷代沿革

周官內史掌王之八柄掌書王命
蓋其任也**漢**有中書謁者令丞屬
少府自武帝遊宴後庭始用宦者典事尚書
謂之中書謁者置令僕射司馬遷被腐刑之
後為中書令即其任也宣帝任中尚書官皆

宦者為令僕射元帝亦以宦者為中書令謂
中人為無外黨遂委以政事事無大小皆決
之成帝改中書謁者令曰中謁者令罷中書
宦者更以士人為之後漢省獻帝時魏武為
魏王置秘書令典尚書奏事此又中書之任
也**魏**黃初初置中書令為秘書改令為監典
尚書奏事又置監與令各一人秩並千石而
中書典尚書奏事若密詔下州郡及邊將則
不由尚書權自此重矣**晉**監令並第三品掌
贊詔命記會時事典作文書舊尚書并掌詔

奏故有中書官而詔悉由中書也。**東晉**更重其職多以諸公領之中興之後以中書之任併入散騎省後復置之。**宋齊**亦置監令。**梁**中書監令並增秩至二千石。**陳**因之以中書分爲二十一局各掌尚書諸曹總國機要而尚書唯聽受而已。**後魏**置監令各一人監爲正一品令爲正二品。**北齊**依**魏**。**後周**依周官春官府置內史中大夫二人掌王言蓋比中書監令之任後又增爲上大夫。**隋**文帝廢三公府僚令中書令與侍中知政事遂爲宰相之

職煬帝十二年改爲內書省。**唐**武德初爲內史省龍朔二年改令爲右相光宅二年改內史開元初改紫薇令。**宋**中書令正一品以檢校官兼中書令謂之使相國初未定官制前異姓未有兼中書令者惟贈官有之太祖太宗時加中書令者惟趙普一人。**大元**中書省有中書令爲宰相之職掌丞天子平章萬機掌軍國之政令緝熙帝載統和天人入則告之出則奉之以釐萬邦以度百揆蓋以佐天子而執大政者也。唐六典

羣書要語

壁門天達鳳沼神深絲綸王言出納帝命未謝
莊讓中書令表職掌詔命王獻之中書令啓

古今事考

銅印軺車

晉制中書令銅印墨綬進賢兩梁冠絳朝服佩
水蒼玉乘軺車

鳳閣鸞臺

自隋唐以來除改百官必有誥勅而其制蓋須
申中書門下省故劉禕之云不經鳳閣鸞臺何
謂之勅

尊寵任職

前漢司馬遷既被腐刑之後為中書令尊寵任
職

賢明選士

蕭望之以中書政事宜以賢明之選自武帝遂
宴後庭故用宦者非因舊又違古不近刑人之
義而欲更置士人

朝端稱宜

太寧初肅祖詔温嶠曰卿既以令望忠允之懷
著於周旋且文清而旨遠宜居深密今欲卿以

爲中書令朝端咸稱以爲宜

貴倖傾朝

石君防與弘恭皆少年腐刑爲黃門以選爲中尚書宣帝時任中書官以恭爲令君防爲僕射恭死君防爲令貴倖傾朝

中書並掌

魏黃初中改秘書爲中書以劉放爲監孫資爲令遂並掌機密歷文明齊王三世

中書專任

蔣濟字子通時中書監令號爲專任濟上疏曰

大臣太重者國危左右太親者身弊古之至戒也往者大臣秉政外內扇動陛下卓然自覽萬機莫不祇肅夫人臣匪不忠也然威權在下則衆心慢上勢之常也陛下既已察之於大臣願無忘於左右

中書五郎

晉諸公讚陳淮爲中書令張華爲監與華俱處機密而推崇之每至直詔書無小大先示華了方措意華得詔書不復示淮者省中號淮爲中書五郎其從容如此

中書令公

高允爲中書令魏文帝重之不名呼爲令公

同車異車

晉記初中監令常同車入朝及和嶠爲令荀勗爲監嶠意高抗專車而坐乃使監令異車自此始

大令小令

晉陽秋中書王獻之卒以王珉爲中書令世稱大令小令珉父洽永和中爲中書令至此珉復紹父人以爲奕世令聞

可謂清官

晉王延之代張緒爲中書令何偃嘆曰晉以子敬季琰爲此職今以延之代緒爲之可謂清官後接之者實爲未易

曰真忠臣

高允爲中書令高宗禮敬甚重晨入暮出或積日居中朝臣莫知所論或有上書言得失者高宗省而謂群臣曰君父一也父有是非子何爲不作書而諫之使人知惡而家內隱處也豈有以父親恐惡而彰於外也今國家善惡不能面

陳而上表顯諫此豈不彰君之短明已之美至如高允者真忠臣也

將授清顯

晉王洽爲中書令年二十九將授之從兄胡之遺書曰弟今二十九便居清顯要任敢不敬以先爲弟啓義讓之路焉若年至四五十之間雖復超登公輔亦非吾所豫况降此還者邪洽遂不拜

宜處機近

王珉傳詔曰新除侍中珉才學廣贍理識清通

宜處機近以叅時務其以珉爲長兼中書令

親幸草屋

高允拜中書令司徒陸儼曰高允雖蒙寵待而妻子不粒高宗是日幸允第草屋數間布被緼袍高宗歎息久之曰古人之清豈有如此即賜帛五百疋

北史

召付紙筆

徐光幼有文才年十三王陽攻頓丘掠光令秣馬光但書柱作詩賦左右以白石勒勒令召光付紙筆光立作頌賜衣服遷中書令

後趙錄

啓乞授子

晉諸公讚華廙爲中書監時多事不泄啓世祖乞授子蒼答詔先時荀勗爲中書監病風復使息暢書啓事皆前後相承以子弟管之

表乞除監

王遵表曰臣表乞得中書監持節專一所司端誠保傳惟力是視有詔曰昔荀公曾徙中書監爲尚書令人賀之乃發恚曰奪我鳳凰池卿諸人賀我邪願足下處之勿疑

宰相參領

王獻之爲中書令啓瑯琊王爲中書監表曰中書職掌詔命非輕才所能獨任自晉建國常命宰相參領中興以來益重其任故能王言彌徽德音四塞者也

內樞兼管

宋泰始起居注王言之職總司清要中將軍丹陽尹王景文夙尚弘簡情度淹粹忠規茂績實資國道宜兼管內樞以重其任

平和有文

吳志胡冲平和有文幹天紀中爲中書令

言語辨捷

張尚有俊才孫皓時為侍郎以言語辨捷見知擢為侍中中書令

風儀秀逸

後魏任城王澄為中書令蕭順使庾華來見澄音韻道雅風儀秀逸謂主客郎中張尋曰往魏任城以武著今以文見美也

進止詳華

唐溫彥博遷中書令突厥降詔議所以安邊者彥博請如漢置降匈奴五原塞以為捍蔽與魏

證廷爭徵不勝其辨天子卒從之其後突厥可汗弟結社謀反帝始悔云彥博善辭令每問四方風臚傳誥命若成誦然進止詳華人皆拭目觀高祖嘗宴近臣遣秦王諭旨既而顧左右曰何如溫彥博

若失一臂

薛收子元超拜中書令兼左庶子帝幸東都留輔太子監國手勅曰朕留卿若失一臂顧太子未習庶務關中事卿悉專之

為第一功

房元齡太宗即位爲中書令第功班賞第一與杜如晦長孫無忌尉遲敬德侯君集功第一

執政事筆

裴炎輔太子是爲中宗改中書令舊宰相議事門下省號政事堂長孫無忌以司空房元齡以僕射魏證以太子太師皆知門下省事至炎以中書令執政事筆故徙政事堂於中書省

介姦黨間

蕭至忠爲中書令時宗楚客懷姦植黨而韋巨源楊再思李嶠務自安無所弼正至忠介其間

獨不詭隨時望翕然歸重帝亦曰宰相中至忠最憐我

父子相失

崔湜拜中書令時父挹以吏部尚書得謝而性貪數爲人請託以干湜湜多不從由是父子相失玄宗在東宮數幸其第申欵密

妻子不粒

見前親幸草屋注

二員相逼

初嘉貞在兵部而張說已爲侍郎及皆相說位在其下議論無所讓故說不平未幾嘉祐拜金

吾將軍兄弟要近人頗憚媚帝幸太原嘉貞以
賊聞說誅嘉貞素服待罪不謁遂出爲幽州刺
史說代其處嘉貞銜悔謂人曰中書令幸二員
何相逼如此

四俊見稱

嘉貞性簡疏與人不疑所薦中書舍人苗延嗣
呂太一考功員外郎員嘉靜殿中侍御史崔訓
皆位清要日與議政事故當時稱曰令君四俊
苗呂崔員

倡封禪議

張說進中書舍人倡封禪議受詔與諸儒草儀
多所裁旨

撰封禪頌

東封還爲尚書右丞兼中書令詔說撰封禪壇
頌刻之太山以夸成功初源乾曜不欲封禪說
固請乃不相平及升山執事官當從者說皆引
所厚超階五品從兵惟加勲而不賜衆怨其專

屏風隔坐

紀隲景皇時爲中書令隲父亮爲尚書令每朝
會語以屏風隔坐

殿前再拜

太安元年有胡人入雲龍門殿前再拜曰我當作中書監令副都虞候治之

創綠野堂

裴度徙東都留守加中書令時闡豎擅威天子擁虛器縉紳道喪度不復有經濟意乃治第東都集賢里鑿山穿池竹木叢萃有風亭水榭梯橋架閣又於午橋創別墅花木萬株中起涼臺署館號綠野堂與白居易劉禹錫爲文章把酒窮晝夜相歡不問人間事而帝知度年雖艾而

精神不衰每大臣自洛來必問度安否開成三年以病而還東都真拜中書令

進金鏡錄

張九齡爲中書令時天長節百官上壽多獻珍異唯九齡進金鏡錄五卷言前古興發之道上賞異之

衣錦晝遊

魏元忠爲右僕射兼中書令請歸鄉拜掃特賜錦袍一領銀千兩并給千騎四人充其左右手勅曰衣錦晝遊在乎茲日散金敷惠諒屬斯辰

布衣位相

岑文本始爲中書有憂色母問之答曰非勲非舊責重位高所以憂也有來慶者輒曰今日受弔不受賀或勸其營產業文本歎曰吾漢南一布衣徒步入關所望不過祕書郎縣令爾今無汗馬勞以文墨位宰相奉稍已重尚何殖產業耶故口未嘗言家事既任職久賚賜豐饒皆令弟文昭主之

力諫遜位

郝處俊遷中書令帝多疾欲遜位武后處俊諫

曰天子治陽道后治陰德陽之與陰各有所主不相奪也况天下者高祖太宗之天下也陛下爲子而守之不宜持國以與人

自後缺位

玄宗時宰相蕭嵩加中書令自張說爲中書令後缺此位四年嵩得之常帶河東節度使

掌文誥職

張九齡一代詞宗爲中書令引韋陟爲中書舍人與孫逖梁涉對掌文誥時人以爲美談有刀筆才

吳薛瑩條例吳事曰胡中意性調美心識解暢
有刀筆才閑於時事為中書令雖不能匡矯亦
自守不能苟求容媚

奪我鳳池

荀勗自中書監為尚書令人賀之乃發恚曰奪
我鳳凰池何賀之有

指謂鷄樹

劉放孫資共典樞要夏侯獻曹肇心內不平殿
中有鷄棲樹二人相謂此亦能幾指謂放資也

命停嚴鼓

太宗車駕征遼中書令岑文本卒帝親臨視撫
之流涕其夕帝聞嚴鼓三聲曰文本殞逝情深
惻怛今宵夜警所不忍聞命停之

索焚表章

馬周為中書令臨終索陳事表草帙手自焚之
慨然曰以官案彰君之過求身後之名吾弗為
也

為安危

郭子儀為中書令二十四考以身為天下安危
言行錄

請言優劣

唐開元二年紫微令姚崇奏紫微舍人六員每議事請舍人同簽狀凡事有是非理均與奪人心既異所見或殊抑使雷同情有未盡臣以為執見不同者望請別作連本狀同奏若狀語交牙恐煩聖思臣既見官長望於兩狀後畧言二理優劣聽進止則人各盡能官無留事勅曰可

開國舊勳

宋趙普端拱初三入相稱疾上表致仕以普為西京留守河南尹加中書令懇辭再四太宗賜

手詔曰開國舊勳惟卿一人而已不同他等母即固避

台樞令德

王旦罷相薨翰林學士承旨李淮等奏議曰太尉王旦踐歷台樞將二十載紀律用張方夏咸服藹然令德洽于民瞻贈太尉中書令

古今文集

雜著

韓通贈中書令制 劉敞

易姓受命王者所以徇至公臨難不苟人臣所

以明大節具官定交霸府委質前朝荷戈共歷
於艱貞錫壤迭分於戎律朕以三靈睽祐百姓
樂推言念元勳方疇異渥蒼黃遇害良用憮然
追升浴鳳之池式表潛龍之舊

新編古今事文類聚卷之五

新集

新編古今事文類聚卷之六

新集

南江富大用時可編

都省部

左右丞相

歷代沿革

黃帝得六相而天地治**堯**以舜宅
百揆**舜**舉八元八愷為十六相**成**

湯始置二相伊尹居右仲虺居左**高宗**得傅

說爰立作相置諸左右**周**召公為保周公為
師相成王為左右**秦**悼武二年始置丞相官

丞奉相助也昭襄始以樗里疾甘茂為左右丞相漢高帝初置一丞相十一年更名相國孝惠高后置左右丞相文帝即位周勃為右丞相位第一陳平為左丞相位第二勃免平專為丞相武帝用劉屈釐為左丞相分官屬為兩府虛其右以待四方之選哀帝元壽二年更名大司徒東京不復置至獻帝建安十三年復置魏黃初元年改為司徒文帝復置中書監令並掌機密自是中書多為樞機之任後置大丞相第一品又有相國晉罷丞相

復司徒永昌元年罷司徒并丞相後或有相國或丞相省置無常而中書監令常管機要多為宰相之任宋孝武以義宣為丞相而司徒府如故齊以丞相為贈官梁罷相國置丞相置司徒陳又置相國位丞相上並為贈官魏晉以來宰相但以他官參掌機密或委知政事無有常官其相國丞相或為贈官或闕不置其真為宰相者不居此官後周置大冢宰其後亦置左右丞相及楊堅為大丞相遂罷左右丞相隋有內史納言是為宰相亦有

他官參與焉唐世宰相名尤不正初以三省長官中書令侍中尚書令共議朝政此丞相職也其後以太宗嘗爲尚書令臣下避不敢居其職由是僕射爲尚書省長官與侍中中書令號爲宰相品位既崇不欲輕授嘗以他官居宰相而假以他官如同中書門下三品及平章事知政事參知機務參與政事及平章軍國重事之名是也武后龍朔元年改侍中爲左相中書令爲右相尚書僕射爲文昌後復改易宋沿唐制以三公至列曹侍郎同

平章事爲宰相 神宗新官制於三省置侍中中書尚書二令虛而不除以尚書左右僕射兼門下中書侍郎爲兩相然中書揆而議之門下審而復之尚書承而行之則是首相不復與朝廷議論矣元祐初司馬公相乃請令三省合班奏事分省治事紹聖以後皆因之時議者謂門下相凡事既同進呈則不應自駁已行之命是省審之職可廢也政和中蔡京以太師摠領三省號公相乃廢尚書令改侍中中書令爲左輔右弼亦虛而不除改

左右僕射為太宰少宰仍兼兩省侍郎靖康
中何文縝將拜相乃先乞復太少宰為僕射
吳正仲當制請更為丞相不從建炎三年呂
元直初相議者請併三省為一於是元直解
中書侍郎改同中書門下平章事乾道七年
十二月詔改尚書左右僕射為左右丞相
元置左右丞相位在尚書令之下平章政事
之上

羣書要語

咨四岳有能奮庸熙帝之載使宅
百揆亮采惠疇書舜典納于百揆

百揆時叙同上允釐百工庶績咸熙帝曰疇咨

若時登庸同上帝曰臣作朕股肱耳目益稷乃

歌曰股肱喜哉元首起哉臯陶拜手稽首乃賡

載歌曰元首明哉股肱良哉庶事康哉同上實

維阿衡實左右商長發夢帝賚予良弼以代

予言乃審厥象俾以形旁求于天下說築傅巖

之野惟肖爰立作相置諸左右若濟巨川用汝

作舟楫若歲大旱用汝作霖雨說命肅肅王命

仲山甫將之邦國若否仲山甫明之烝民王命

仲山甫式是百辟王躬是保出納王命王之喉

舌衮職有闕惟仲山甫補之並同上理百官而

察萬民平邦國而和天下揚盈川集登明選公

雜進巧拙紆餘為研卓犖為傑校短量長惟器

是適者宰相之方也韓進學解宰相所以代天

者也輔贊彌縫而藏諸用使斯人由而不知非

明哲曷臻是歟唐房杜贊當左輔右弼之寄摠

代天典物之名典領百僚陶融景化唐代宗大

曆二年詔

九功不叙咨尔緝熙五品不時咨尔

寅亮必廣大其志無皦察為公常其道以秉彝

裕其體以臨下唐李絳制位愈高而士愈戴祿

愈厚而人愈懷唐元稹加階制從容鼎位光贊

大猷元冕赤舄在帝左右又云推忠導善達四

方之志弘往納來成天下之務杜佑碑武明七

德文洽九歌棟才斯全鼎味以適呂蒙正集宰

相者上熙陛下覆燾之恩下遂羣生性命之理

以正百度以和四時韓文啓黃扉而變五緯躡

青帷而調四序孔稚圭為王敬則讓司空表天

方賚予人具瞻尔張弘靖制

詩句絳灌歸衡宰後漢酈炎詩皇佐揚天惠四

時無交兵曹子建一氣轉洪鈞杜大厦須異才

廊廟非庸器文榮公鼎軸老烹幹力健促韓文

公貴相山瞻峻清文玉絕瑕同上稷契光虞夏

伊呂翼商周南史王儉少有宰輔志材館經春

瑞氣浮當時曾約相車遊白樂天平生五色線

願補舜衣裳杜牧旱歲天教作霖雨明時帝用

補龍山王建上張相公終當持一筆再入福蒼

生劉夢得送令狐相公有官居鼎鼎無地起樓

臺魏野上寇萊公一戰文場拔趙旗便調金鼎

佐無為王仁格上傳相國玉鼎升黃閣金章謁

紫宸任希古今朝靜聽丹漏尚疑身在玉堂

中歐詩但今端委坐廟堂北狄西戎談笑了坡

詩不羞老圃秋容淡且看寒花晚節香韓魏公

詩舜舉十六相身尊道何高杜子美詩吾愛房

與杜魁然真宰輔黃閣三十年清風一萬古唐

皮日休左轄頻虛位今年得舊儒相門章氏在

經術漢臣須杜霖雨思賢佐丹青憶老臣應圖

求駿馬驚代得麒麟沙汰江湖濁調和鼎鼎新

杜十年紫殿掌洪鈞出入三朝一品身文帝寵

深陪雉尾武皇恩厚宴龍津李德裕詩

古今事實

古今事實

黃閣朱門

鄭玄云朱門洞啓當陽之正色三公與天子禮秩相亞故黃其閣以示謙不敢斥天子疑是漢舊制也

金印紫綬

漢丞相金印紫綬黃扉黑幘所以異車服於百辟也百官制又丞相相國皆秦官金印紫綬掌丞天子助理萬機同上又天子之相號為丞相黃金印而尊無敵秩加二千石之上賈誼新書柱石之臣

丞相王商國家之柱石臣也其人守正不詘節前元后傳又宰相國家柱石不可不强吳陸凱

棟梁之用

隋大業中高孝基謂之曰公有應變之才當為棟梁之用又宰相之門豫章栢栢雖小已有棟梁之器南史陸凱傳

有宰相器

何武初為郡吏時太守何壽知武有宰相器前本傳又寇恂明經行修名重朝廷所得秩俸厚施朋友及從吏常曰吾因士大夫以致此可獨

享之乎時人歸其長者謂其有宰相器又孟康
薦崔琳曰切見司隸崔琳牧守州郡所在而治
及爲分司萬里肅齋誠台輔之妙器衮職之良
材後崔琳傳

有宰相體

後朱浮論吳起與田文論功不及者三朱買臣
難公孫弘十策弘不得其一終之田文相魏公
孫宰漢誠知宰相自有體也

五龍夾日

狄仁傑蒙恥奮忠以權大謀引張柬之等卒復

唐室功蓋一時而人不及知故呂溫頌之曰取
日虞淵洗光咸池潛授五龍夾日以飛世以爲
知言本傳

一柱承天

姚崇與張說有隙崇死謂其子曰我死張說來
弔爾以我平日寶玩盡列于前如說屬目即舉
以獻之就問其求神道碑纔得即模刻以示外
此人見遲稍緩即悔彼不顧則吾族無噍類矣
子如其言說來果屬目稱去後即以獻之遂求
所爲文說許之故其碑曰一柱承天高明之位

列四時成歲亭毒之功深後說悔來索則碑已
模刻矣說歎曰死姚崇猶能算生張說後譖不
行唐紀

論功第一

漢高祖五年論功行封上以蕭何功最盛先封
為鄼侯功臣皆曰蕭何未嘗有汗馬之勞徒持
文墨議論又論位次皆曰曹參身被七十創攻
城畧地功最多宜第一鄂千秋曰曹參野戰畧
地之功此特一時之事耳漢與楚相守滎陽數
年軍無見糧蕭何轉漕關中給食不乏全關中

以待陛下此萬世之功也今雖無參等百數何
缺於漢柰何以一旦之功而加萬世之功哉蕭
何當第一曹參次之

人物第一

唐李揆同平章事帝曰卿門地人物文學皆當
世第一信朝廷之羽儀乎本傳

一代家臣

蕭何曹參皆起秦刀筆吏碌碌未有竒節漢興
依日月之末光位冠羣公為一代家臣蕭曹本贊

一代偉人

姚狄蘇宋皆一代偉人或三入相再入相未有
不久於其事能成令名焉柳氏家學文

漢室伊周

周勃登輔佐正國家難誅諸呂立孝文為漢室
伊周前周勃傳

江左夷吾

晉桓彝傳王導為丞相彝見導極談世事還謂
周凱曰向見江左管夷吾無復憂矣

蕭曹丙魏

近觀漢相高祖開基蕭曹為冠孝宣中興丙魏

有聲丙吉贊

房杜姚宋

唐三百年輔弼者不為少獨前稱房杜後稱姚
宋相繼為相崇善應變成務璟善持正守法二
人志操不同然叶心輔佐使賦役寬平刑罰清
省百姓富庶唐世賢相前稱房杜後稱姚宋他
人莫得比焉姚宋贊

蕭曹畫一

蕭何薨曹參聞之告舍人曰趣治行吾且入相
使者果召參參代何為相事無所變更遵何之

約東百姓歌之曰蕭何為法講若畫一曹參代之守而勿失載其清靜民以寧一本傳

丙魏相濟

漢魏相為相丙吉代之相嚴毅吉能濟以寬同心為政上皆重之

謝安風流

王儉曰江左風流宰相惟有謝安蓋自况也南史

嘉貞風操

初天兵使張嘉貞入朝或告其反按無狀帝令坐告者嘉貞辭曰國之重兵利器皆在邊今告

者一不當即罪之恐塞言路天子以為忠且許以相及宋璟罷帝欲果用嘉貞而忘其名詔韋抗曰朕常記其風操今為北方大將張姓而復名因閱表疏遂得其名即為中書侍郎同平章事本傳

不對錢穀

周勃為右丞相上問勃一歲決獄幾何勃謝曰不知問錢穀一歲出入幾何又謝不知上問陳平曰各有主者上曰君主何事曰宰相者上佐天子理陰陽順四時下遂萬物之宜外鎮四夷

諸侯內撫百姓使卿大夫各任其職王陵傳

不問闕傷

丙吉出逢羣鬪者死傷橫道吉過之不問前行
逢人逐牛牛喘吐舌使騎問逐牛行幾里矣掾
吏謂前後失問吉曰民鬪傷京兆尹職當禁捕
宰相不親小事非當於道路問也方春牛喘此
時氣失節恐有所傷三公典調陰陽職當憂是
以問之掾吏乃服以吉為知大體魏相傳

遜直濟文

太宗定禍亂而房杜不言功王魏善諫而房杜

遜以直英衛善兵而房杜濟以文房杜贊

應變守文

姚崇善應變以成天下之務宋璟善守文以持
天下之正二人所以佐唐使中興也姚崇贊

同管朝政

如晦與元齡同管朝政引士賢者下不肖咸得
其職當時浩然歸望房杜贊

不閱訟牒

太宗謂房元齡曰公為僕射當廣朕耳目助訪
賢才比閱訟牒日數百豈暇求人哉乃勅細務

屬左右丞大關僕射房元齡傳

與仆植僵

太宗用元齡如晦於大亂之後紀綱彫弛而能與仆植僵使號令典刑燦然罔不全雖數百年猶蒙其功然求所以致之之蹟逮不可見房杜贊

獻可替否

唐蘇頲與宋璟同當國相得歡甚璟曰吾與蘇氏父子同為宰相僕射長厚自是國器若獻可替否事至即斷盡公不顧私則今丞相遇之通鑑不負天子

陸贄為相所言皆拂帝短或規其太過對曰吾上不負天子下不負所學唐本傳

總領眾職

前魏相字弱翁宣帝即位遂為丞相帝始親萬機厲精為治練羣臣核名實而相總領眾職甚稱上意本傳

開誠布公

蜀先主即帝位策亮為丞相曰丞相其輔朕之闕助宣重光以照明天下評曰亮之為國也撫百姓示儀軌約官職從權制開誠心布公道可

謂識治之良材諸葛亮傳

同心濟謀

唐杜如晦方為相時天下新定臺閣制度憲物率二人討裁每議事帝所如晦長於斷而元齡善謀二人深相知故同心濟謀以佐佑帝故當世語良相必曰房杜本傳

憂邊思職

前丙吉代魏相為丞相吉馭吏出見驛騎馳赤白囊馭吏隨至公車知虜入雲中吏歸白狀吉召東曹案邊長吏科瑣條其人詔問虜所入郡

邑吉具對見謂憂邊思職本傳

薦賢助國

李吉甫執政謂裴均曰比日人物吾惜不及知君精鑒謂我言之均即崖略疏三十許人吉甫籍以薦于朝天下稱得人薦賢助國宰相之職也

開閣延賢

公孫弘既相於是起客館開東閣以延賢人一曰欽賢館以待大賢次曰翹材館以待大賢次曰接士館以待國士其有德任毗贊佐理陰陽

者處欽賢之館其有材堪九列將軍中二千石者居翹材之館其一介之善一方之藝者居接士之館躬自菲薄俸祿皆以給之西京雜記

起家薦人

田蚡以肺腑為相起家薦人或至二千石權移主上本傳

為真宰相

隋高穎有文武之大略明達政務朝野推服議者以為真宰相本傳又上謂魏相真漢相識兵略達時令文中子又王商有威重容貌絕人單

于來朝商坐未央廷中單于前拜謁商離席與言單于仰視商貌大畏之遷延却退天子聞而歎曰真漢相矣

為救時相

唐姚崇在告政事委積元宗謂盧懷謹曰朕以天下事委崇以卿坐鎮雅俗耳崇出頃更裁決俱盡顧謂齊澣曰余為相可比何人未對崇曰何如管晏澣曰管晏之法雖不能施於後猶終其身公所為法隨復更之祇可謂救時相崇曰救時相豈易得哉

以春秋相

自公孫弘以春秋之義繩臣下取宰相前食貨志

以明經相

韋賢為丞相少子玄成復以明經歷位至宰相

故鄒魯諺曰遺子黃金滿贏不如教子一經本傳

布衣登相

漢制常以列侯為相唯公孫弘布衣登相位武

帝乃封為平津侯其後為故事至丞相而封自

弘始通典

宗室進相

唐宰相以宗室進者九人林甫幾亡天下李程和柔在位無所發明其餘皆以材稱職號為賢宰相唐贊

一日台司

唐王徽為相只一日中書五年二月除昭義節度徽上表乞免詞曰六年內署雖叨捧日之榮一日台司未展致君之懇南部新書

一歲至相

唐李訓起流人一歲而至宰相

二朞至相

張鎬起布衣二暮而至宰相

十年至相

李絳十年之間位至宰相

八十為相

張東之為相年且八十矣

二十三年

房元齡以盛德居相位二十三年

二十四考

郭子儀校中書令二十四考

為兩朝相

隋高穎事文煬兩朝有文武大略執政將二十年朝野推服論者以真宰相

再升三入

唐宰相再入者長孫無忌狄仁傑李吉甫三人者劉幽求張延賞鄭畋四人者韋巨源姚元崇韋安石五入者蕭瑀裴度職源又宋璟謝表云再升台座三入冢司

十拜四登

裴度十拜相詔四登師壇除平章事制

父子至相

前漢平雷傳云漢興惟韋平父子至宰相又唐戴胄子至德父子繼為相

兄弟並相

卞粹以清辨兄弟六人並登宰輔世稱卞氏六龍

入如父年

唐李吉甫年五十一出鎮淮南五十四復相今德裕自鎮南外入相一如父之年

八葉皆相

唐蕭瑀傳自瑀逮遇凡八葉皆宰相名德相望

與唐盛衰世家之盛古未有也

繼踵皆相

後楊震論延光之間震為上相抗直方以臨權枉先公道而後之名可謂懷王臣之節識所任之體矣遂累葉載德繼踵宰相信哉先世韋平方之蔑矣贊曰楊氏載德乃世柱國

九十八族

唐宰相三百六十九人九十八族其盛有如此者

輩行不名

陸贄以才幸天子常以輩行呼而不名

尊任不名

李吉甫還秉政入對延英凡五刻罷帝尊任之官而不名

詔賜堂封

唐源乾曜同紫薇黃門平章事帝詔中書門下共食實戶三百堂封自此始並同上

詔給堂食

唐開平詔丞相尊位而堂樹未給無滄錢其令日食萬錢之半續通典

賜白羽扇

張九齡在位因帝賜白羽扇乃獻賦末自况曰苟效用之得所雖殺身而何忘本傳

賜熟釜銘

鍾繇魏國初建拜相國文帝在東宮賜繇五熟釜銘曰於赫有魏作漢藩輔厥相惟鍾實幹心三齊靖恭夙夜匪遑安處百僚師師楷茲度矩三

國志本傳

賜筋表直

宋璟為宰相朝野人心歸美焉時春御宴帝以

所用金筋令內臣賜璟雖受所賜莫知其由帝
曰非賜汝金蓋賜卿筋以表卿直也開元遺事

賜酒賞言

李吉甫盛贊天子德憲宗欣然絳曰今日西戎
內訌烽燧相接誠陛下焦心求濟時之畧渠便
高枕而卧哉帝入謂左右曰絳言骨鯁真宰相
也遣使者賜醪醪酒唐李絳傳

拜相沙隄

唐故事凡拜相之後禮絕班行府縣載沙填路
自私第至子城東街名曰沙堤

朝會火城

每元日冬至大朝會百官已集而宰相方至珂
傘列燭多至數百炬謂以火城宰相火城至則
衆皆滅燭以避之李肇國史補

金甌覆名

唐元宗命相皆先御書其名案上會太子入侍
上舉金甌覆其名而告之曰此宰相名也汝知
其誰耶射中賜卮酒肅宗曰非崔琳盧從愿乎
上曰然通鑑

紗籠護身

唐卜者胡蘆生筮卜甚驗李藩嘗問生生日貴
人也在紗籠中李問所由終不復言後有新羅
生言宰相冥司必潛以紗籠護之恐為異物所
擾也唐紀

以銀為信

鄴侯傳代宗欲相泌元載忌之帝不得已出泌
約曰後召當以銀為信忽除銀青光祿大夫泌
知載敗已且相矣未幾果然

設榻以待

唐制政事堂不接客自元載為相中人傳詔者

引升堂置榻待之李峴去即敕吏撤去唐志

去卿失左右手

房元齡為相十五年以權寵隆極累表辭位帝
遣吏謂曰遜誠美德也國家相眷賴久一日去
卿如亡左右手本傳

去卿如斷一臂

高宗幸洛陽詔薛振與太子居守上曰朕之留
卿若去一日若斷一臂關西重事悉以委卿本傳

槐枝應相

相國李石河中永樂有宅庭槐一本抽三枝直

堂舍屋脊一枝不及相國同堂兄弟三人曰石
曰程皆登宰執惟福一人歷七鎮使相

槐音入相

唐尚書省南門有古槐垂陰至廣相傳夜深聞
絲竹之音省中即有入相者俗謂之音聲木見
因話錄

焚香擇相

唐廢帝欲擇宰相問於左右皆言盧文紀及姚
顛有人望廢帝因悉書清望官內琉璃瓶中夜
焚香祝天以筋挾之首得文紀欣然相之五代

經函龍骨

僕射裴遵慶母皇甫氏少時常持經經函中有
小珊瑚樹異時忽有小龍骨一具立於側時人
以爲裴氏祥上元中遵慶遂居宰輔云廣異記

宰相金榜

崔昭暴死復生云見冥間列榜備書人間姓名
將相列金榜其次列錫榜州縣並列長鐵榜曉
之唐書

夢神授筆

五代唐末帝時馬裔孫赴闕宿邏府其地有神

祠夜夢神手授二筆及爲翰林學士裔孫以爲契夢筆之兆洎入中書上事堂吏奉二筆如夢中所授者太平廣記

夢錦半臂

正元中相國竇參爲御史中丞嘗一夕夢德宗召對於便殿以錦半臂賜之默念曰臂者庇也大邑所以庇吾身也令夢半臂者豈上以某叨居顯位將給半祿俾我致政乎客有解曰半臂者被股肱之衣也今公夢天子賜之豈非上將以股肱之位而委公乎明日果拜中書侍郎平

章事出宣帝志

夢金字牌

唐杜相鵬舉父夢有所之見一大牌云是宰相碑也已作者金填其字未作者列名于上杜問曰有杜家兒否曰有任自看之記得姓下其鳥偏傍曳脚而忘其字乃名鵬舉鵬舉生鴻漸而名字亦前定矣嘉話錄

一言寤主

漢田千秋無他材能術業特以一言寤主旬月取宰相世未有也

十事要君

姚崇以十事要說天子而後輔政顧不偉哉姚崇傳贊

懷慎伴食

盧懷慎開元中遷黃門監與紫微令姚崇對掌機密懷慎自以吏道不及崇每事皆推讓之時人謂之伴食宰相

味道摸稜

蘇味道前後居相位數年不能有所發明依違其間苟度取容而已嘗謂人曰處事不欲決斷

明白若有錯誤必貽咎譴但摸稜以持兩端可矣時人由是號為蘇摸稜

立本丹青

唐閻立本既輔政但以俗材應務無宰相器姜恪以戰功擢左相時人有語左相宣威沙漠右相馳譽丹青

妄男千秋

武帝征和三年以車千秋為丞相千秋無材能學術又無閎闕功勞特以一言寤意旬月取宰相世未有也後漢使至匈奴單于怪而問之曰

聞漢初拜丞相以何用得之使者以上書言事
故單于曰苟如是非用賢也妄一男子上書即
得之矣本傳

歇後鄭五

鄭縻每以詩謠託諷中人有誦之天子前者昭
宗意其有所蘊未盡因有司上班簿署其側曰
可禮部侍郎同中書門下平章事縻本善詩其
語多俳故使落調世共號鄭五歇後體至是省
吏走其家上謁縻笑曰諸君悞矣人皆不識字
宰相亦不及我吏言不安俄聞制詔下歎曰萬

一然笑殺天下人既視事宗戚詣慶搔首曰歇
後鄭五作宰相事可知矣固讓不聽立朝侃然
無復故態

指鹿為馬

李斯既死趙高為丞相事無大小輒決於高高
欲為亂恐群臣不聽乃先設驗持鹿獻二世曰
馬也二世笑曰丞相誤邪謂鹿為馬問左右左
右或默或言馬以阿順趙高或言鹿者高因陰
中以法後群臣皆畏趙高遂有望夷之禍

牽犬逐兔

秦用李斯之計二十餘年竟并天下尊秦王為
皇帝以斯為丞相及二世即位聽趙高之譖使
高按斯下獄榜掠千餘不勝痛自誣服斯自負
於國有功實無反心乃從獄中上書趙高使吏
棄去弗奏於是具斯五刑論腰斬咸陽市斯出
獄與其中子俱執頽謂子曰吾與汝復牽黃犬
俱出上蔡東門逐狡兔可得乎父子相哭而夷
三族

味道春雪

唐武后時三月大雨雪蘇味道以為瑞率羣臣

入賀王求禮曰宰相調燮陰陽而季春雨雪乃
災也果以為瑞則冬月雷渠為瑞雷邪

景佺秋花

唐武后嘗季秋以梨花示宰相以為祥衆賀杜
景佺曰陰陽不相奪倫瀆即為災今草木黃落
而木復花瀆陰陽也恐陛下布德施令有所虧
紊臣位宰相助天治物而不和臣之咎也頓首
請罪武后曰此真宰相也

嘆稱亡鏡

太宗嘗謂侍臣曰夫以銅為鏡可以正衣冠以

古為鏡可以知興替以人為鏡可以明得失朕嘗保此三鏡以防已過今魏徵傾逝一鏡亡矣

命停嚴鼓

太宗將伐遼時岑文本為中書令凡所籌度一以委之文本受委既深神情頓竭言辭舉措頗異平常太宗見而憂之謂左右曰文本與我同行恐不與我同返及至幽州遇暴疾而終其夕太宗聞嚴鼓之聲曰文本殞逝情深惻怛今宵夜警所不忍聞命停之

新編古今事文類聚卷之六

新集

古為鏡可以知興替以人為鏡可以明得失朕嘗保此三鏡以防已過今魏徵傾逝一鏡亡矣

命停嚴鼓

太宗將伐遼時岑文本為中書令凡所籌度一以委之文本受委既深神情頓竭言辭舉措頗異平常太宗見而憂之謂左右曰文本與我同行恐不與我同返及至幽州遇暴疾而終其夕太宗聞嚴鼓之聲曰文本殞逝情深惻怛今宵夜警所不忍聞命停之

新編古今事文類聚卷之六



